

Ed.

640. Frumvarp til laga

um þjóðargrafreit á Þingvöllum.

Flm.: Jónas Jónsson, Haraldur Guðmundsson.

1. gr.

Ríkið heldur við og verndar sérstaklega grafreit á Þingvöllum fyrir íslenska afburðamenn, konur og karla.

2. gr.

Engan má jarðsetja í þjóðargrafreitinn, nema liðin séu 25 ár frá andláti hans og a. m. k. 5 ár frá því að síðast var jarðsett í grafreitnum.

3. gr.

Tilmæli um, að maður verði jarðsettur í þjóðargrafreitnum, skulu fyrst borin fram við ríkisstjórn, sem leitar álits Þingvallanefndar um þau. Ef nefndin mælir með tilmælunum eða ríkisstjórnin ákveður að styðja þau, skal tillaga þess efnis send forseta sameinaðs Alþingis ásamt skriflegri greinargerð. Forseti leggur tillöguna undir úrskurð Alþingis án umræðu. Heimild Alþingis er veitt, ef $\frac{3}{4}$ hlutar þingmanna eða fleiri eru á fundi og $\frac{3}{4}$ þeirra samþykkja tillöguna.

4. gr.

Þingvallanefnd sér um framkvæmd greftrana í þjóðargrafreitnum, en ríkissjóður greiðir kostnaðinn.

5. gr.

Lög þessi ganga í gildi 1. janúar 1947.

Ákvæði til bráðabirgða.

Ríkisstjórnin skal gera ráðstafanir til þess, að leifar Jónasar Hallgrímssonar verði fluttar til Íslands og jarðsettar í þjóðargrafreitnum á Þingvöllum þegar á þessu ári.

Greinargerð.

Fyrir nokkrum árum lét ríkisstjórnin í samráði við Þingvallanefnd gera sérstakan grafreit á Þingvöllum, er ætlaður var sem legstaður íslenskra afburðamanna. Var skáldið Einar Benediktsson jarðsettur þar fyrstur, árið 1940.

Engar reglur hafa til þessa verið settar um, hversu haga skuli ákvörðunum um, hverjir þar skuli jarðsettir.

Þingvallanefnd telur eðlilegt, að um það verði settar ákveðnar reglur með lögum, og flytja því þeir nefndarmenn, sem sæti eiga í efri deild, frumvarp þetta.

Nánar í framsögu.